

LO MULET É LO TCHARET

PATOIS DE CHALLAND-SAINT-ANSELME

(PAR MARICA PINET)



[1-2] Y ire un co un pitiò mulet qu'ou sé permounae tot fiér, in trottèn é in damouren-se davo li minà dou vuladjo. Un bé djor li minà i l'an deut : « Ah, ma totùn, comèn ou saret bé sé lo mulet ou l'isse un tcharet ! ».

[3-4] Donca pappagràn l'at deut : « É bin, vo lo fèjo iò lo tcharet ! ». Donca ou l'at pré dé achón, ou l'at pré lo marté, ou l'at pré la résetta, ou l'at pré la taravéla, ou l'at pré li quiouè, po ou l'at resà, copà, tchapotà é pin é poun é pin é pan.... é ou l'at fét un bé tcharet.

[5-6] Apré ou l'at fét co li rouè dé bo, ou l'at buta-ie un bé sercle outor é ou l'at mounta-ie ou tcharet. Djacque, li minà i y iron prou fiér ! É lo mulet co dé pieuch : el dévàn é lo tcharet apré !

[7-8] Li minà i tchardjaon la frutta can y alaon réchavié li pomme. Un djor, i l'an tchardjà pién lo tcharet dé pomme é lo mulet ié dijae : « Na parì, l'et trop pézàn ! ».

[9-10] Ma li minà i l'an pa hcouta-lo, i l'an butà uncò dé pomme... parì, can lo mulet l'et moudà, lo tcharet... ou l'at fét crac ! Donca lo mulet ou piourae : « Naaaa, ellamondieu... lo miò bé tcharet ! ».

[11-12] Boneur qué pappagràn ou l'at pasà per la é ou l'at deut : « Ma coui l'è-té qu'ou pioura ? ». Li minà i l'an deut : « Ah, l'et lo mulet perquè lo tcharet l'et rot ».

[13-14] Donca pappagràn ou l'at dehtacà lo tcharet, ou l'et tornà préndre lo marté, la résetta, la taravéla é li quiouè é pin é pan, é pin é pan... ou l'at aréndjà lo tcharet.

[15-16] Lo mulet ou y ire tot contèn ma ou l'at deut : « Minà, tsi co pamach buté tan dé pomme su lo miò tcharet ! ». É li minà dou vuladjo, tot contèn qué lo pitiò mulet ou l'ae quiuttà dé piouré, i l'an fét eunna bélla ronda outor dou tcharet.